

Acta XVI synodi provincialis urbis Gröningae et Omlandiae, uthgeschreven van dem wolgebarnen grafen und hern, h. WILHELM LUDEWIG stadholder, sampt den E. E. wisen und seer discretenn vörsenigen hern Staten der stadt Gröeningen und Omlanden, ijn Appingadam tho holden anno 1610 7 Majj, in bijwesende des E. E. raetshern WILHELM BARNEDA und ock des E. E. jünckhern HIDDO JENSSMA, als gecommitterden des collegii.

Sessio prima hora secunda pomeridiana 8 Majj.

Is tegenwordiger synodus van domino BERNHARDO THEODORICI, prediger der stadt Grönningen und ijm vörloopenen jahre gewesenen praeside, angefangen, unde nha geendigtem gebede dorch gemeine stemme der jegenwordigen broderen praeses eligert dominus WULFGANGUS AGRICOLA, prediger tho Loesdorp, assessor D. BERNHARDUS THEODORICI, prediger ijn Grönningen, scriba ULRICUS BULTENIUS, p. in Haren.

2. Und sint nhafolgende personen uth den 7 classibus deser provincien der stadt Grönningen und Umblanden gedeputeret und comparert:

I. classis Groningana: D. BERNHARDUS THEODORICI, prediger ijn Grönningen, D. EGBERTUS HALBES licentiatus, senior, D. ULRICUS BULTENIUS, pred. tot Haren;

II. classis Dammonensis: D. GEORGIUS PLACIUS, pastor ijn Appingadam, D. JOHANNES LAXTENIUS, p. ijn Holwijerda, D. TITUS THEODORICI, pred. ijn Slochter;

III. classis Loppersumana: D. WULFGANGUS AGRICOLA, p. in Loesdorp, D. JOANNES SCHRODERUS, p. in Westerebden, D. IESREEL VINCKELIUS, p. in Loppersum;

IV. classis Middelstumana: D. REGNERUS EMPENII, pastor ijn Westerwittwart, D. ANTONIUS STROMBERGIUS, pred. in Rottüm, D. GODFRIDUS LOMELJERUS, p. in Usquärtt;

V. classis Enerumana: D. TIDO DANIELIS, pastor in Baffloe, D. HESSELUS NICASII, p. in Ulderum, D. SAMUEL SMALTZIUS, prediger ijn Wetzigen;

VI. classis Adwerdiana: D. HERMANNUS THEOPHILUS, past. in Leeckercke, D. HALJO ILBERI, prediger ijn Garnewertt, D. NICOLAUS PETRI, pastor in Fissfleeth;

VII. classis Oldenamptt: D. JOHANNES LOLINGIUS, p. ijn Nordtbroick, D. SAMUEL NEITZ, pastor in Süetbroeck.

Uth Nordt und Süethollandt sint vör dithmael keine deputati anhero gekahmen.

3. Is nha averantwordinge der credentzbrefen censura morum gehalten, und ijs (godtloff) under jegenwordigen predigern nemandt ahn lehre und levendt dermathen straffbar befunden, dat enigem nit solde sessio hebben mögen gegunnet worden.

4. Sint gravamina omnium classium ijngenhamen unde domino JOANNI SCHRODERO, pastori ijn Westerebden, item domino JOANNI LOLINGIO, p. ijn Nörtbroick, in ordinem tho redigeren averantwordet.

5. Is hiraha dem vörsammelden christlichen synodo vorgestelt die sake JOHANNIS CUPERI, pastoris ijn Grijskerck etc. Darup geresolvert, dat die pastor met sine wederpartije sal gecitert worden tho compareren vor desem synodo.

6. In saken CASPARI GOLTZII ijs ock geresolveret, dat he ahn desen ahngestellden synodum sal citeret worden.

7. Hiraha hefft der christliche synodus guetgefunden, datt der pastor ijn Middelstum D. JOANNES NICASII mith kerckvögeden und vullmachten vant carspel sole ad synodum geciteret worden, umme nha verhoer ehrer quästios saken der kercken wolstandt to beforderen.

8. Dewile ock des pastoris tho Bedum sake nit geachtet wordt, dat se vullenkaemlich sij affgedaen, is geresolvert, dat he de novo sall citeret worden.

9. Hefft die gemeinte van Osterwittwertt dem synodo ein request avergegeven, darin se sich beklagen, dat sie vörstanden, als hedden die h. gecommitherden der closterguderen, alss collatoren vörordinet sinde dersulven carspelkercke, sich vorgehahmen desulven pastorien-gudere tho vörminderen offte to veralieneren thot nadeel der carspel-

luiden, dahero sie den kunfftig eines predigers mosten gentslich berovet sin, beden derwegen dem synode beleven mochte hirin nha mögeliheit tho remedieren.

Synodus dith versoeck perpenderende und hochbillich achtende resolviret, dat ehnen ahn die E. E. heren gecommitherden eine schriftliche intercessie sall mithgedelet worden, dat die E. E. heren wolle beleven ehr rechtmetiges christliches vörsoeck platz to geven, und nit unfruchtbaer lathen affghaen.

Idt belastet ock synodus darbenevenst classem Loppers., darunder gedachte kerecke sortert, dat se desolve gemeinte solen ernstlich ermahnen sich mith flithe nha einen guden lehrer um tho sehende umb sulvigen den h. commitherden vör tho stellen, darmith se met Gotts h. worde desto ehe mögen versorget werden.

Sessio secunda hora 7 antemerid. 9 Majj.

Sint anfangs bij deser session erschienen die E. E. heren Gedeputerden Staten, als die E. E. WILHELM BARNEDA und de E. E. junckher HEDDO JENSSMA, und wegen swaricheit und veelfoldiger geschefften ehr langes utheblivent entschuldiget.

Hirinha sint die acta synodalia praeteritorum annorum tho revideren for die handt genamen.

Artic. 3 sessionis secundae gelesen sinde van reparatie der vörfallenen kercken tho Oterdum, blifft bij vöriger resolutie, und hebben dese tegenwordigen heren Gedep. grothgunstiglich ahngenahmen bij här medecollegen sich tho bearbeiten, dat hetsulve up den landesdach ijn der propositie mochte vörgestellet worden, mitz dat die deputati synodi tselve hernha to bequamer tidt bij se wedderum versoecken mosten.

Artic. 4 ejusdem sessionis belangende MELCHIOR BALTASAR, schoelmeister tho Oterdum, darüp relateret classis Dammonensis, dat gemelter schoelmeister sine beloffte nha ehnen kein testimonium geexhiberet, sondern sich als ein fugitivus darvan gemaket. Is befahlen pro memoria ahn to teickenen umb andere van desem fraudulento socio nha gelegenheit te verwittigen.

Artic. 5 van junge kindere ijn hüseren tho döpende, ordineret synodus hirin nha der kerckenordering inholtt des 39 articuls dersulven te procederen.

Post haec sijnodus ad sacram concionem audiendam in templum prodivit.

Sessio tertia hora secunda pomeridiana.

Fusis ad Deum precibus sequentia sunt proposita.

Ahnfangs ijs van domino praeside den E. E. h. Gedeputerd. tho gemothe geföret, wo hiebevör gebrüicklich gewesen, dat de E. E. hern Gedeput., dem synodo bijwahnende, mith credentz allewege sin versehen gewesen, ock tho wat ende sie darbij erschienen, hebben plegen ahn tho melden.

Darup die E. E. heren vörgemeldt sich rotunde erkleret, dat genöchsam kundich, wo se sich sulvest thot desern wercke niet yngedrungen, sondern ordinarie tho Gedeput. herenn van Stadt end Umlanden wehren eligert, derowegen se ock hörer antecessoren locum billich bekleideden, dat sie averst for dithmael niet enen commissie edder literas honorarias mith sich gebracht, wehre ijn der ihle wegen veelfoldiger geschefften, darmith die E. E. heren sonstich belastet, vorbleven. Erboden sich nittemin, da men solches van ehnen jo begeren wehre, ehre credentz jedertidt genochsam te demonstreren, worahn synodus ghar woll vörgenöget gewest.

Darnha hebben die E. E. heren dem synodo angemeldt, wat mathen ehnen van dem pastore Woltersumano etzliche ungeboerliche enormiteten vörgekahmen, desshalven men ehne billich tho reden stellen solde.

Res. synodus, dat he sole geciteret worden.

Ock ordineret synodus, dat pastor und koster van Farmsumb solen anhero geciteret wordenn.

Hirna ijs ijm synodo erschienen JOHANNES BRUENS, schoelmeister tho Oldendorp, van dem ehrwerdigen ministerio Embdano gerecommenderet, vörsökende einen schoeldienst. Darüp belaevet ehm synodus wedderum ahn den E. E. junckhern GAYKOMA ¹⁾ tho recommenderen um bij densulven promotie tho bekahmende. Unde sobalde etwas gewisses ijn siner sake wurde uthgerichtet sin, belavet dominus BERNHARDUS THEODORICI, pastor in Groningen, hem tsulve bij die Embder prediger tho vörstendigen.

Wider sint die articuli superiorum annorum tho revideren vor die handt genhamen.

Artic. 8 belangende eine eheordening ahn to stellen, res. synodus, dat deputati synodi up den landtsdach solen ernstlich darum anholden, darmith die E. E. heren mochte believeen hirin vörsehing tho döhn, dat solche noidtwendige eheordening ter ehren Gades und siner kercken heil mochte angestellet unde vorferdiget worden.

Artic. 9 van Papistischen schoelmeistern und kosteren etc. aff tho schaffen blifft bij voriger resolutie, dat solches dorch die deputatos synodi nochmals ahn die E. E. heren Gedeput. sole vörsocht worden. Und belaven

¹⁾ „Gaykoma” YY heeft „Gaickema.”

die praesente heren dat, sovele ehre personen bedreffe, sie hirin einen ernst bewisen wollen, mith ferner thosage dat sie bij hoer medeheren sich dahin wollen bearbeiten, darmith thot affhöring der kereksaken allewege de Woensdach ijn der weke ordinarie möge bestemmet werden, ahn welchen den deputatis synodi, ock anderen ecclesiae ministris audientz gegeben, und sovele mögellik die kereksaken mögen effectuert worden.

Artic. 10 bedreffende den prediger toe Winsum sine gasie tho vorbeteren, belastet synodus nochmals die vörhen hirtho verordente prediger dese saeeken unnachlessig bij dem E. E. höveling TAMMINGA vört tho setten.

Artic. 12 belangend die visitatio classium belevet dem synodo wol, wen se cum autoritate geschehen und grothe excessive kosten darbij mögen verhödet werden. Belastet deswegen deputatos synodi hirim kunfftig bij die E. E. h. Gedep. an tho holden, doch also dat de provincie de kosten darup ghaende dragen mochte.

Artic. 13 van erfülling des getalles der deputatorum uth einem jeden classe ad synodum, sall dieselve in effect gehalten worden.

Hirna sint folgende gravamina sessionis sextae revideret.

Grav. 7 van underholding der armen schölern unde studenten etc. Is darüp van tegenwordigen heren deser bericht gedaen, dat ijm vörledenen jahre schoen darinne geschehen und eine merckliche summa van den E. E. heren thot dem fine ahngelecht sij.

Grav. 9 dat sich beklagen etzliche prediger, sonderlich so closterkercken bedienen, dat ehnen die classicale kosten werden geweijert.

Res. synod., dat die clagenden solen bij die E. E. h. gecommitherden ansöeken, und woferne desswegen wider mangel vörfill, nehmen die E. E. hern Gedeputerd. ahn intercessie te doehn.

Grav. 11 belangende die vörstorvene eleemosinarios umb höre nhagelathene erffniss thot der armen profijt tho forderen und an tho wenden, res. synodus, nhadem ein erbar hochwiser raedt numehr dessfals eine güde ordeninge publiceren lathen, dat demnha deputati synodi up den landssdach mochten anholden, darmith ijn den Omlanden darin ock also mochte vörfahren worden.

Hienttusschen sint die ingesetene van Oterdum avermhael erschienen, anholdende dat ehre ijn krigeslüfften gedemolierde kereke mochte repareret worden.

Res. Wert van dem synodo güetgeachtet und den deputatis uperlacht up den landtdach umb solch heilsam werck to befördern flitich an tho holden.

Artic. 19 wegen die gravamina van einem classe tho dem anderen soes weken vor dem anfanck des synodi aver to senden is vörordenet, dat (so Godt will) upt naestfolgende jahr ein jeder classis sall höre gravamina 6 weken vor dem synodo ahn die prediger toe Gröningen aversenden, diewelche nha vörlesing und genochsamer innehmung des inhalts desulven forder ad Dammonens. classem, Dammonensis nhamals forder ad Loppersuman. classem, und so fort ein jeglicher ahn den nahestgelegenen sall gelangen lathen.

Artic. 20 blifft bij voriger resolutie, dat synodus alternatim thot Gröningen und Appingadam propter locorum commoditatem sole gehalten worden.

Artic. 21 van mature tho erschinen up angestemmeden dach in synodo wert noch geapproberet bij poena van $1/2$ slichten daler, daetlich tho erleggen.

Folgen die gravamina generalia et specialia superioris anni.

1 Grav. van tidt, darup deputati synodi solen thosamen kahmen, wert vorige resolutie noch vor güet erkant.

2 Gra. belingend die unkosten deputationum solen deputati bij de E. E. h. gecommittenden folgender tidt ansoeken umme dersulven betaling, gelich ijn vorledenen jahre 1609 uth cloesterguderen dieselve gunstiglich ijngewilligt unde solveret ijs worden.

3 Grav. bedreffend der Mennisten und Papisten exercitia. Wert avermaels den deputatis uperleecht sowol bij den E. E. heren des rades als ock des collegii dominos deputatos an to holden, dat die ijn vorigen jahren gepublicerde placcaten mochten ter executie gestellet worden.

4. Van exhiberen in synodo testimonia vitae et doctrinae der nijen anghamenen prediger, wert alssnoch hochnodich geapproberet.

Sint hirup in continenti D. JOANNIS SCHÖNEBERGII, pastoris ijn Adewertt, vitae ac doctrinae testimonia exhibert und nha vörlesing in synodo cum omnium applausu geapprobert.

5 Gravamen van affstellung der prediger, die sich enormiter vörlöpen. Wert die ijn vorledenen synodo genhamene resolutie alsnoch geapproberet.

6 Grava. van schoelmeistern, kosteren und kerckvogeden, dat sie solen membra ecclesiae sin, wert die darup ergangene resolutie geapprobiret.

7 Gr. van unbehörliche combinatien der pastorien, die niet met consent der h. Gedeput. gemaket sin. Wort den classibus uperlecht, dat sie solche combinatien thom spodigesten ahn die E. hern Gedeput. refereren umb deselve up tho heven.

Die combinatie van Esingen und Saxum ijs to casseren, wile Saxum sufficient sall sin einen egenen prediger to holden.

Die negen kercken ijn Fredewolt sölen vorerst ten minsten mith twe prediger bij provisie vorsehen worden, datwelch classis Adwerdiana sich sall beflitigen um ijn effect toe stellen.

Hirnae ijs ijm sijnode getönet und gelesen eine missive, uth Deventer ahnt ministerium tho Gröningen und Embden gesonden, wegen eines verlopenen unehrlichen kerckdeners, mith namen BARTHOLOMEUS SCHRANTZ, so uth der Paltz gekamen und einem andern sinen ehegaden entföret, dat dersulve mochte ijn acht genahmen unde niet geduldet werden.

Sessio 4 hora 8 antemeridiana 10 Majj.

14 Art. bedreffende die praeposituren wert nochmals, also beth hero geschehn, geapproberet und deputati belastet, dat sie tidtlich den E. h. Gedeputerd. solen hirvan wedderüm erinnering dohn, darmit solches up den landtssdach ijn propositione vorgestellet möge worden, welchs die itz praesente h. Gedeput. grothgunstiglich bij hare medeheren nha utherstem vermöge vört tho setten sich erbeden.

Van dem 15 gravam. sessi. 7, oft men up hochfesten mehr also twe dage predigen sall, is beschlaten, dat ijdt bij voriger resolutie sall bliven.

Inglichen dat 16 grav., oft men den luiden to gefalle up Passche edder Pingstdach dat nachtmael holden mag, wert noch bij voriger resolutie gelaten.

Also ock 18 grav., dat keine ungedöpede solen copulert worden etc. Wert vorige resolutie geapproberet mith deser additie, dat die form, tegens die Wedderdöper und hare ungeboerliche copulatie van die Osterwerff geresolveret, dorch deputatos synodi erkundiget werde, und alssden deputati sich nhamals dahan bearbeiten, dat bij den Westerwerff ock sodane resolutie mochte geapproberet und ahngnahmen werden.

Idt wert ock ijm synodo vorgestelt und raetsam befunden, dat men die personen, so vanhir ijn Oestfriesslandt oder sonst up andere plaetsen vortrecken und sich entweder van Lütherschenn oder Papistischen copulieren lathen, hirim solen tho rede gestellet worden. Und woferne ehre ding unformlich befunden, sall ydt ahn die hoge avericheit defereret worden umb amende tho stellen thot dem ende, darmit allhandt unordening, so darher errisen konde, mögen praecavert worden.

Grav. 20. Dat die kerckvogeden ijn den Umblanden sonderlich ijn vacerenden plaetsen, dar klachten van kahmen, solen geholden worden ter reckenschop, wert vorige resolutie noch aprobirt.

Grav. 21. Van dem gnadenjahr der nhagelaten wedewen unde weisen pastorum defunctorum hujus provinciae res. syn., dat ijdt sole bliven bij de resolutie, so anno 96 11 Maj in personlicher bijwahning des wolgeb. h. h. WILH. LUDEWIG etc. angaende desen genamen ys.

Folgen die generalia gravamina, ijn desem sijno do van den deputatis classium exhiberet.

Grav. I. — Dat vör allem die ijn vorgangenen synodis ijngebrachte gravamina geeffectuert mögen worden, unde worum tselve beth herto niet geschehn.

Synodus ordinert darüp nochmals einhellig, dat deputati sijnode, so kunfftig hirtho upgestellet werden, die beth hero unvorrichtede saken und gravamina, sowol olde also nije, flitich nha bestem vörmögen effectueren mögen.

II. — Dat die kerckenordeninge up den synodis werde gelesen unde darnha alle swaricheiden affgedaehn.

Res. Wert geapproberet, und ijs demsulven up desem synodo met flithe nhagesettet.

III. — Offt men kerckenschulde mith pastorien, vicaren edder sonst anderen thot dem underholt der deneren verordenten guderen behöret to betalen.

Resolv. negative 1), inholt der kerckenordening und nha oldem landesgebrueck.

IV. — Offt ein prediger ijn unschuldigen dingen sinen dienst uth dwang möge resigneren sine consensu classis, und wen solchs geschehn, offt niet classis macht hebbe desulve to casseren.

Res. Wert deser articulus geapproberet vor billich und recht und der kerckenordening conformlich, dat unschuldige prediger, wen sie dermathen sonder classis consensu wurden resigneren, van dem classe sölen gemanuteneret worden.

V. — Offt ock befaembte personen edder sonst, die in concubinatschop sich thosamen holden, behören kinder ter döpe to dragen.

Res. Wert tho discretie eines jeden predigers gestellet, unde achtet synodus, dat nit absolute alle befambte personen aff tho wisen, wile

1) „negative“ YY heeft „negando“.

tho vörhapan, dat noch ehrer etzliche dorch de christliche heilsame ermahnung, so bij administratie der hilligen döpe geschiet, konden ijm hertzen geröret und dem h. Christo gewinnen werden.

VI. — Offte niet met ernste het mandaet van enthillinging des sabbathdages behoret effectueret tho worden.

Hirvan belaven die praesente h. Gedeput., also deses synodi assessores und directores, dat sie die E. E. ehre medeheren des collegii willen mith flithe ersoecken, darmith alle redgern dahen mögen vermahnet worden jegen die lichtferdigen und moedtwilligen vöbrekere des sabbaths einen ernst te dohn, nur dat deputati synodi tho gelegener tidt wedder bij gemelte heren darum sullen mothen anholden.

VII. — Offt nit met ernste den wickers, duvelbanners und Wedderdoperen so mith relegatie und ock inhibitie behöret gewehret te worden, dewile sie der E. E. heren Staten mandaet tho mehrmalen vorachten.

Res. synodus, dat ein jeder classis möge thom forderlichsten solche personen naemkundich macken den synodi deputatis, diewelche ferners hirmit belastet werden ahn die E. E. Gedeput. flitig tho vörsocken tegens sodahne personen umb desulven tho vordelgen einmael einen ernst to ertögen.

Hirnahe sint van dem classe Loppersumana domini JOANNIS STOVERI Bremensis, pastoris in Berum, vitae et doctrinae testimonia exhibert und ijn vörlesing dersulven also befunden, dat synodus ein güet genögen daran gehatt hefft.

Sessio 5 hora 2 pomeridiana 10 Maij.

Der pastor van Woltersum HENRICUS JOHANNIS ijs up ergangener citatie ijm synodo erschienen und up folgende puncten tho reden gestellet:

I. — Dat he druncken sinde einen borger van Gröningen met einem bloten messer sole vörfolget hebben. — Fatetur.

II. — Dat he sine steeffdochter ijn der herberge solde met einem glas beres geschlagen ende gequätzt hebben. — Negat.

III. — Dat he ijn dersulven herberge up eine andere tith die werdinne geschlagen, unde ock deswegen wedderum van hoer sij gequätzt worden. — Fatetur.

IV. — Dat he desen gehelen winter dorch und dorch fast wekentlich druncken gewesen sij. — Fatetur.

V. — Dat he Dingstdages vor dem bededage uppet Schutendeep dermathen mith beer averladen gewest, dat ehne menniglich mith fingern ahngewiset. — Fatetur.

VI. — Dat he Passchemaendach, alss he den vörigen dach des Heren

aventmael gehalten, sich flüx mith drunckenheit wedder besudelt. — Fatetur.

Up solche sine gedahne bekenteniss resolveret synodus, dat gemelter HENRICUS JOANNIS, wile dersulve hirbevor nit alleine broderlich und veel-foldich thor betering des levendes ermahnet, sondern ock wegen solcher scandalen van sinem officio gesuspenderet gewesen und dannoch (leider) weinich betering erfolget, numehr wegen siner avermahl begangenen ergerlichenn enormiteten sall vermoge des 50 articuls der kerckenordening des hilligen predigampts entsettet sin.

Up dat speciale gravamen classis Dammonensis contra classem Loppersuman., tho wethen dat se CASPARUM GOLTZIUM, aldar tho Godelinsen residerende und wegen siner excessen van andern plaetsen vordreven, bij sich dulden, hefft dominus praeses hören classem ijn deser sake dermaten purgeret, dat synodus genochsam verstanden, wo GOLTZIUS classe invita darsülvest stha, und hebben derwegen classem van soleker anklage frij erkandt.

Widers in saken D. CASPARIS GOLTZII resolvret synodus, oft dersulve wol van den Godelinsern hebbe eine vocation bekahmen, und darup van den E. E. hern Gedeputerden ein apistil eniger confirmatie uthgebracht, so befinde sich dennoch uth twen orsaken, dat gedachter GOLTZIUS nit richtig gehandelt und niet recto pede ijn den dienst tho Godelinsen ijn-getreten: einmael dewile he vörmals dem coetui tho Embden expresslich angelavet umb den dienst tho Godelinsen niet ahn to fehrden noch sick jemals dartho gebruicken to lathen, blickende solches uth der Embderschen prediger missive ahn den classem Loppersumanam; fort ander indem he die van dem Embdano coetu thot dessem fine erlangede reconciliation-schrift, dat he tho Neermoer pro vicario mochte thogelaten werden, also hefft missgebruicket, dat he die Neermoers, so ehme dorch ehre vocerent thor reconciliatie geholpen, liderlich vorlathen und sich darmit nha Godelinsen gemaket, aldär siner vörgedahnen belöffnis thoweddern den dienst classe inscia et minus consentiente anghamen; dat demnha van dem coetu Embdano söle nochmals schriftlich erkundiget worden, oft CASPARO veelgemelt solche reconciliationschrift thot dem ende sij gecommuniceret, dat he under dem praetext den dienst tho Godelinsen mochte ahnnehmen, item oft der coetus ock kone raetsam befinden, dat GOLTZIUS ahn dessem orde, da vele unser wedersaker van Papisten und Mennisten ingesethen, solde stichtelick mögen gecontinueret worden.

Wortup ock ferners CASPARO GOLTZIO deser affscheidt gegeben ijs, dat he nha vörloping eines monats sole van den deputatis synodi ijn dessem sinem handel bescheitz gewerdich sin.

Nach desern ijs D. JOANNES NICASIUS, pastor ijn Middelstumb, in synodo erschienen und ahngemeldet, dat sine gemeinte mith ehrem grothen ungestuem, ahnropen, krijten und nhahöijten, wegen dessen dat sin söhne FRANTZ ijn enigen dingen sich tegen tarspel vorgrepen, ehne darhen gedrunge und bewagen, dat he sinen predigerdenst bij ehnen uth schwarmodicheit hedde mothen resigneren.

Sint darup nhamals ock sine contraparthien, tho wethen die beiden kerckvogeden ende twe ledemathen alsß vüllmachten van der gemeinte, erschienen und einen upgerichteden vödrach vörtönet, benevenst einer unförmlichen confoederatie und vöbindnisse hörer ingesethenen, deses inholts dat se dominum NICASIVM vorgemelt wegen der feijte siner sohnes nha desern dage nitt mehr predigen hören, noch ahn ehnen und ehren kintere die hilligen sacramenten wolden administreren lathen.

Synodus dith alles wol rijplich betrachtende hefft wol gesehn und gespöret, dat de process tusschen D. NICASIO und sinen partien nit conformlich der kerckenordnung, also de classis gantzlick ijs vorbijgegangen, demwelchen NICASII discess tho ordelen competeret, dennoch wegen grothe vöbittering und starcke vorbunteniss der parthen, ock dat NICASIUS sulvest frijwillich resigneret, niet begerende aldar tho continueren, so ijs demnha die contract, tusschen partien upgerichtet, van desern synodo ijn sinen weerden und unwerden gelaten, overmitz dat die karspelluiden hebben angenehmen domino NICASIO ein ehrlich getüchenisse siner wolverholdniss mith tho delen, unde hem eine tidt etzlicher monaten ijn der pastorienhusinge tho wahnende gestaden sölen und willen, alsß ock van desern synodo ehme ein honorificum testimonium geaccorderet unde mithgedelet ijs worden.

Sessio 6 hora 7 antemerid.

Anfangs ijs der pastor van Wedda, dominus PETRUS SCEPELITZIVS, ym synodo erschienen klagende aver sin geheel sobere tractament und geringe upkumsten, de sich niet hoger streckeden alsß nur dartzich gemeine daler und 15 mudde rogge, diewelche hem noch seer difficulter wegen armodt der ingesethenen aldar entrichtet werden. Vörsuchte deswegen promotie up einen andern plaetz.

Is ehm die antwordt gegeben, dat synodus siner wolle indechtig sin, offt he konde mith der tidt up einen andern bequämeren plätz getransfereret worden. Woferne averst solches nitt mochte geschehen können, solde he noch dit jahr patientz dragen. Die praesente h. Gedeputerd. nehmen sinentwegen ahn bij höre medeheren sich dahen tho bearbeiten, dat siner ijm Hage, nhademmale gedachten pastoris locus büthen deser provincien sorterde, solde umb verbetering des salarii gedacht und

angeholden, oder sonsten extraordinarie etwas thogelecht und vormaket werden.

Nha desen ijs pastor Bedumanus, D. PETRUS LUCANUS, up ergangene citatie gecompareret mith 3 vullmachten des edl. ehrf. junckhern ERNST VAN ISSELMUDEN, unde ijs der pastor vörgemelt erstlich to reden gestellet und gefraget worden:

I. — Worum he form jahre up die ahn ehme ergangene citatie sich nit coram synodo gesisteret? Respondit, dat he van hüs ijn Oestfreesslandt vorreiset gewesen mith wolgedachten sinem junckheren ERNST VAN ISSELMUDEN.

II. — Is he gefraget, diewile synodus ijn erfahrung queme, wodat he bij siner gemeinte unstichtelick solde leven, alss begerde men van ehme tho vörnehmen, wo sick die saecke desfals vorheelde? Respondit ad interrogatum hoc: he vörhapede sine gemeinte wehre mith ehme wol thofreden. Men solde die ahnwesenden vüllmachten darum befragen und enfrösschen. Bekande averst thogelick, dat eine vörbitteringe bij etzlichen weinigen tegens sine persone wehre entstanden, so darher rörede uth enigem piheck wegen dessen, dat he domino VERUTIO die inwanning bij hem ijn der pastorije tho Bedum hedde lathen upseggen etc.

Sint ferners ock ijngefördert die ahnwesenden dree vulmachten, tho wethen EVERT JACOBS, alss ledemathe, HERMAN ALBERTS und JOHAN BARTELS, diewelcke umb hören pastoren gefraget sinde hebben semplich vorklaret, dat he sich höres wethens niet ungebörlich ahnstellede, sondern also dröge, dat die gemeinte ehme tho holden wol begeren solde, except dat he mith domino VERUTIO wegen rhueming uth der pastorien ijn unenicheit geraden wehre, demewelchen etzliche weinigen upt loech wahnende wehren bigefallen. Wat dieselven mochten hebben tegens ehm tho praetenderen, wehre ehnen twar unbewust.

Hiernha ijs den deputatis des classis Mfddelstumb van domino praeside ernstlich up hoer gewethen befahlen und uperlecht, dat se solden uprechte vorklaring dohn, wile van PETRO LUCANO allerhandt van menniglich gesprengt wurde, under andern ock dat he sich ahn verscheidenen personen deser order hedde willen befriegen, da he doch schoen ijn sinem patria eine früwe gehabt. Woferne sie darvan niet wurden vorklaren, wat ehnen und dem classi hirvan bewust, solden se kunfftig darvor angesehen werden.

Hefft darup dominus REGNERUS EMPENII geantwortet, dat he wol die gerüchten hedde gehöret, averst nit sekens darvan hedde tho specificeren.

ANTONIUS STROMBERGIUS averst bekande, wo he ijn specie gehöret, dat PETRUS LUCANUS solde begeret hebben, dat der frijer oder rivalis van

Eppingenhüsen, welcher nha *CORDES* 1) dochter werven lethe, mochte ijn siner frijete upgehouden werden, beth he (*LUCANUS*) uth sinem patria bescheit erlangede oft sine aldar getruwede ehme ock deser order folgen wolde.

LOMELJERUS sede, he wüste van den saken nit egenlickes.

Darup nhamals *PETRO LUCANO* frageswise vorgestellet ijs, oft he nit nha enige personen sowol thot Gröningen als tho Bedum ijn siner ahnkunst gefriet. Res. dat he for Gottes ahngesicht alhir betügen wolde, dat he nha keiner personen weder tho Bedum noch tho Gröningen jemals geworven.

Wile den also *PETRUS LUCANUS* ijn siner rede und wandell nit al tho uprecht befunden, is forerst hem sulvest van dem synodo uperlecht, dat he sall gehouden sin ijn tidt van 6 weken testimonium copulationis, quo tempore et per quem desolve geschehen, item testimonium vitae anteactae et discessus, imgelicken ock wovele besondrige kinder sine fruwe mith sich anhero gebracht, van dem magistraet und predigern dessulven ördes den deputatis synodi inleferen sall.

Darbenevenst belastet noch synodus classem Gröninganam um gehn 2) Itzehoe, sowol ahn die werltliche avericheit alss dat ministerium des ordes tho schriven, dardorch van ehnen tho erkundigen, oft nit *PETRUS LUCANUS* der örder ijn enigem dienste gestanden, watt mathen he sich dar gedragen und van ehnen sinen affscheidt genhamen, ithem wanneer und wor he aldar gecopulert sij.

Lestlich resolvert synodus nha desem allen, also dese met *PETRO LUCANO* erschienen vüllmachten niet die gantze gemeinte repraesenteren, die wederpartien ock noch niet erschienen und gehöret sin, und he (*P. LUCANUS*) susslang nit hefft konen *sufficiencia vitae anteactae testimonia exhiberen*, alss kan synodus ijn *LUCANI* sake nit finaliter decideren, sondern wil sich vörbeholden hebben hirin dorch höre deputatos bether tho inquireren und nha erkundigung doehn, alse ijdt der kercken Gottes mach stichtelick erachtet werden.

Nha disem ijs up citatie der pastor van Fermsum *D. HILDO LAMBERTI* erschienen, klagende aver sinen köster und dessulven fruwe wegen allerhandt wrevel und moedtwille in schelden, kifen und hönslagen und dergelichem trotz, darmith he sich gedachtem sinem pastori opponerde.

Wile averst beclagter koster up citatie absent gebleven, sich averst dorch ein demodich schrivent jegen dem synodo erklaret te emenderen und jegen dem pastori sich bether tho schicken unde ahn to stellen, alss

1) „Cordes” YY heeft „Coerdes”.

2) „gehn” ZZ heeft „hehn”, YY „gen”, d. i. naar.

underleth synodus for dithmael stricto jure met beclagtem to procederen, und belastet classen, dat se nha inholt der kerckenordering den koster siner amptsplichtt und geboer wal ernstlich solen erinnern, ehne to schuldiger obedientz und subjectie tegen den pastoren upt scharpeste vormahnen, und bij gebreck van gehoersamheit und emendatie ijdt ahn die E. E. heren des collegii refereren, de alsdenne solen wethen, wat sich tho dohnde geboren will.

Hirna sint die gravamina wedder for de handt genhamen.

X Gr. — Offt niet nödich, dat koster und schoelmeistren jährlichs yn classibus twemael erschienen umb gecensureret tho werden. Synodus approbat.

XI. — Dat de classes solen gehalten worden genochsame reden tho geven, offt sie ock behörliche censuren gebrucket hebben aver diejenigen, so mith ergerlichen excessen sich vörlophen.

Synodus approberts nochmals, und belaven die classes hirin ehren flith und ernst willen ahnwenden. Da se ock hirinne suemachtig mochten befunden worden, underwerpen sie sich gerne censurae synodi.

XII. — Dat ock ijn die closteren, dar karspelkercken gewest sin, prediger mögen ijngestellet werden.

Res. synodus, dat synodi deputatis beleven möge mith iver darumme an tho holden.

Sessio 7 hora 2 pomerid.

Sint ijm synodo de wedderpartijen PETRI LUCANI pastoris Bedumani angekahmen, tho weten die E. E. GERLACUS VERUTIUS, also medecollator van die kercke tho Beem, JOHAN PETERS, olderling van de kercke, noch JOHAN PETERS, ledmathe van die kercke, vormeldende mith clagen, wo ehnen de vam synodo affgesondene citatie ahn het carspel Bedum nit tho rechter tidt thogestellet, sondern velemehr for ehnen wehre supprimeret worden, hedden averst ungefehr etwas darvan vornahmen, dat ant carspel sodane citatie gedahn wehre. Derhalven sie den uth christlichem iver umb die kercke Gottes tho stichten, overmitz einer under ehnen schoen aver die 30 jahre der gereformerten relligie thodaenich gewest, und dan ock mede uth versoeck des E. E. junckhern E. ISSELMUDEN, wehren anhero up den synodum gekahmen. Also averst der synodus numehr fast solde geendiget worden, und sie wegen benauthheit der tidt hore actien, de sieluiden tegens ehren pastoren (lcider) wegen sines ergerlichen wandels wol hedden tho praetenderen, nit konden itzo ordentlich ende schriftlich proponeren, wolden se ahn den synodum fruntlich hebben versöcht umb enige deputatos ahn tho ordinen, die

kunfftig ehre gravamina aver gedachten prediger mochten ijnnehmen und darvan judiceren.

Sijnodus hoer versoeck vorstanden hebbende resolveret, dat ehr begerent sole standt hebben, met bijvormelding dat schön bereits dem pastori uperlecht wehre inwendig 6 weken testimonia copulationis, vitae anteaetae, item discessionis ex Holsatia den synodi deputatis tho exhiberen, tegens welche bestemde tidt se ock ehre actie tegens den pastör verferdigen mochten.

Hirna ijs in synodo comparert D. JOHANNES CUPERUS, pastor ijn Grijskercken, klagende bedroefflich aver eine fruwesminsche tegenwordich sinde, diewelcke hem einer ergerlichen misshandeling beschuldiget und bij sinen thohörern sehr ahnruchtig gemacket, begerde sich ijn dem tho vördedingen, ungeachtet he van dem synodo dickmals wart vörmahnet ijn sin gewethen tho ghan, und da he sich solcher undaedt schuldig erkende, keinesweges tegen dese persone jure tho procederen, velemehr sich tho bekennen, die gemeinte frijwillich vorlathen und Godt umb vörtijunge an tho ropen.

Worüp gemelter CUPERUS, sine unschuldt glichwol mith trahnen hoch bedüerende, nochmals umb aütdientz thot redding siner unschuldt anlangede, welches hem up sin instendiges anholdent ijs thogelathen.

Hefft hirup CUPERUS enige articulen avergegeven, darnha sine wederpartije mochte geexamineret worden, und ijs sie nitt ijn allen bestendig und uprecht erfunden worden.

Idt hebben ock alle getügen anghaende dat factum mith der fruwen nits anders wethen tho seggen, alse wat uth der früwen munde sulvest was hergekahnen, de dat factum mede perpetreret hadde.

Sijnodus hebbende ingenhamen die klachten van denen van Grijskercken, aver ehren pastoren gedahn, verklaret, dat se desulven nit hebben konen genögesam ahnnehmen vor bewiss van sine schüldt.

Remitteret synodus datselve thom competenten richter, injungerende den beiden parthen, dat se daetlich ijntt recht die sake verforderen sölen, mitz vörklarende dat he noch ijn sin wahnepaetz und geneth der upkumsten sall mögen continueren beth thot Michaelis, so die sake nitt ehe konde affgedaehn worden, dem classi injungerende, dat sie den dienst midlerwile bedenken, und dat ijn die erste praedicatie deses synodi decret effte resolütie angedenet und vorgedragen werde, vormahnende beide parthen, dat se sich underdes christlich und brüderlich met einander verdragen.

Hirnae sint die gravamina specialia, so ijn dessem synodo exhiberet worden, vörgenamen.

I Gra. — Dat classis van het Oldeampt dolert aver den bedroveden tho standt der gemeinte van Westerwoldingerlandt und datt woste, ruhe levendt etzlicher diener aldar, dewile se bethhero mith dem classe ijnt Oldeampt vörknuppet, und nu dorch befehl van die E. E. heren borge-meistern und raedt sejungeret, und sie nit genochsam sin sulvest classem tho holden, dat die synodus anders darinne wolle vorsehen.

Res. synodus, dat ahn S. G. den heren staedtholder van desern synodo doer ein request ijn underdahnicheit sole mith flithe versocht werden um gude order aver die prediger des ordes tho stellen, darmith die grothe unordening bij hoerluiden mochte affgeschaffet unde Christi kercke aldar erbuwett werden.

II Gra. — Classis Dammonensis begeret noch also offte thovören, dat die wickersche van den Ham vordreven werde.

Res. synodus, dat ydt dorch deputat. synodi ahn die h. des collegii sole vörsocht werden.

III. — Die van het Oldeampt doleren, dat die vicariengüdere den predigern enttagen offte bekortet werden und tho andern dingen implojert, niet achtende het ernstliche mandat van börgemeistern ende raedt, anno 1603 darvan gepasseret, darmith die E. E. heren sodanige guderen denn predigern ijn frijdöhm gestellet.

Sijnod. resolv., dat deput. syno. bij die E. E. hern vam rade möchten vörsocken, dat het placacet anno 1603 gepubliceret oek möge effectüert worden.

IV Gra. — Wert van enige prediger dolert, dat bij copulatie der ehelüiden einer mith einem blothen schwerde vorahntrede und dreemael ijn die kerekdöre schleith, oek andere rumoren mith scheten und klochludent under der predigt macken, begeren darin anders möge vörsehen worden.

Res. synodus, dat ein ider prediger darinne möge vörsocken die competente avericheit jedes ordes.

Sessio 8 hora 6 antemerid.

Is ijn synodo geresolvirt und for güdt angesien, dat die personen, so tho deputatos synodi eligert werden, oek die visitatie der classen um vörmidung desto mehrder kosten solen ahn sich hebben unde thogelich vorwalten.

Sint darüp van dem synodo tho deputatos vörordenett: D. JOANNES ACRONIUS, prediger der stadt Groningen, D. ANDREAS STRATEMANNUS, p. ijn Sütetwolde, D. JOANNES LOLINGIUS, pred. ijn Nördtbroeck, D. JOHANNES SCHRODERUS, p. in Westerebden.

Beschluetlich hebben die E. E. hern gecommittēdēn des collegii van wegen S. G. und die E. E. hern gedeputerden eine ernstliche und getruwe vōrmahning gedaen ahn die samptliche jegenwordige broderen, dat ein jeglicher classis ehre confratres und kerckendiener, so under ehrem classe sorteren, flitig und ernstlich sole ermahnen thor godtsalicheit und christlichem iver ijn ehrem anbefalenem hogenn ampte, imglichen ock thom hilligen, erbaren wandell ijnn ehrem levende, darmith sie ehren thohōrern mith gudem exempel mögen praeluceren und vōrluchten, updat die, so van uns achterreden alss van ōveldederen, unse güde wercke sehen unde Godt gepriset werde. Darbenevenst und insonderheit, dat se ock diejennen, so ijn ehrem classe mith drunckenheit und andern ungebōrllichem wesende den weddersakeren und fienden der waren relligion grothe ergerniss geven, thor betering ehres levendes wall ernstlich vōrmahnen, updat die kereke J. Christi beides mith reiner lehre und uprechtem wandell bij uns möge gestichtet und vōrtgeplantet werden tho der ehre Gades unde veler minschen seelenheil und ewige wolfartt. Welche ermahning van den semptlichen broderen ijn schuldiger danckbarkeit ijs angenhamen mith wunsching uns allesamptt hirtho die hulpe, gnade und segen des allmachtigen Gades. Amen.

Also ijm ahnfang des synodi censura morum gehalten, und glich we dhomals also ock nu nemandt (godtloff) culpabel offte straffbar befunden, so ijs hirup mitt dancksaging tho Godt dem Heren die synodus geendigett, und hebben de anwesenden prediger semptlich unterschreven.

WULFGANGUS AGRICOLA, prediger to Loesdorp, synodi praeses.

BERNHARDUS THEODORICI Nordanus, assessor.

ULRICUS BULTENIUS, prediger ijn Haren, scriba synodi.

EGBERTUS HALBES, licentiatus, senior.

JOHANNES SCHRODERUS, pastor ijn Westerembden.

IESREEL VINCKELIUS, minister Loppersumanus.

JOHANNES LAXTEN, prediger in Holwijrda.

GEORGIUS PLACIUS, ecclesiastes Dammonensis.

REGNERUS EMPENII, past. ijn Westerwitwartt.

ANTONIUS STROMBERGIUS, eccl. in Rottum.

TITUS THEODORI, p. ijn Schlochtern.

HERMANNUS THEOPHILUS, p. ijn Leechkercken.

JOHANNES LOLINGIUS, p. ijn Nordtbroick.

SAMUEL NEITZ, p. ijn Suetbroeck.

GODOFRIDUS LOMEYERUS, p. in Usquartt.

SAMUEL SMALTZIUS, p. in Wettzingen.

HESSELUS NICASII, p. in Ulderum.

TIDO DANIELIS Cnipensis, pastor in Baffloe.

Finis.

Fer Jesu nobis indigentibus salutem.
